


Chiavenna (part 1) – en viadi tras las anteriuras Terras subditas da las Trais Lias

■ Clavenna è ina citadina taliana a la sbuccada da la Bergiaglia en la Val Son Giachen, center da la Val Clavenna che furma cun la Vuclina l'actuala provinza da Sunder, talian Chiavenna (uffizial), tudestg Cläven/Kleven (istoric). L'antica Clavenna, documentada en l'«Itinerarium Antonini» ed en la «Tabula Peutingeriana», è vegnida conquistada l'onni 16 a.C. da las truppas d'Augustus e colliada cun Cuira sur il Spleia d'ina vart e sur il Set respectivamain il Malögia e Güglia da l'otra vart. Il contadi da Clavenna è sa constituì probablmain en il decurs dal 10avel tschientaner, a l'entschatta dal domini saxon dad Otto I ch'ha attribuì la Bergiaglia l'onni 960 da Villa ensi a l'uestg da Cuira, determinond qua tras il cunfin anc oz existent tranter l'Italia e la Svizra.

Il 1030 era Clavenna gia ina citadina. En il 12avel tschientaner ha ella obtegnì benefizis e privilegis grazia a las bunas relaziuns cun l'imperatur Friedrich I Barbarossa. Igl è stà propi a Clavenna che l'imperatur ha dumandà, a la vigilia da la Battaglia da Legnano (1178), invanmain agid militar da ses cusurin Heinrich il Liun, duca da Baviera e Saxonia. Da quel temp ha l'uestg da Cuira revendigà per l'emprima giada il territori da Clavenna, suttaless a l'uestg da Com; il 1178 è el s'avanza vers il sid da las Alps fin a Plür. Il 1335 è Clavenna passà, ensemen cun il territori da l'uestg da Com, als Viscontis da Milaun. L'imperatur Ludwig il Bavarais e, diesch onns pli tard, era il retg Carl IV da la Boemia han ordinà, senza success, l'annexiun dal contadi da Clavenna a l'uestg da Cuira. Durant tut il 15avel tschientaner en las vals da Clavenna stadas infeudadas als Balbianis da Varenna. Il zercladur 1486 era entrada in'armada grischuna, ch'aveva profità da l'appel dal papa Innocenz VIII da cumbatter ils Sforzas, successurs dals Viscontis a Milaun, en la Val Son Giachen ed a Plür ed era sa retratga pir suenter avair sblundregia e mess Clavenna en tschendra. Il favrer 1487 avevan empruvà ils Grischuns d'entrar cun 600 umens dal Spleia, da la Bergiaglia e da Piattamala (Puschlav) en Vuclina, ma senza success; els eran percenter reussids da penetrar da Livign en la Val da l'Adda e da batter ils Vuclinai sper Sunder. Il duca da Milaun, Ludovic il Mor, è vegnì en agid ed ha la-



Impressiun da la citad veglia da Chiavenna.

schà construir tranter il 1488 ed il 1492 mirs da fortezza enturn Clavenna ed ils centers principals da la Vuclina, cun l'agid finanziar da las communitads dal contadi. Quests mirs en dentant daventads obsolets gia il 1512, cura che la citadina da Clavenna e la val en passadas, suenter 12 onns sut domini despoti franzos, a las Trais Lias ch'han pudì spustar lur cunfins al sid dal sparta-auas, s'unir als aliads venezians e prevegnir al privel d'invasiuns a l'improvista. Entant ch'ils lieus confederats svizzers sustegnevan il papa Julius II e la Lia sontga, ha l'armada da la Lia da la Chadé, cumandada da Conrad von Planta, assagli la citadina da Clavenna ils 22 da matg 1512, e las armadas da las duas autras Lias grischunas en entradas en Vuclina. Sis mais pli tard è vegnì conquistà il chastè da Clavenna.

Il contadi da Clavenna era dividì en trais giurisdicziuns, numnadamain en quella da Clavenna (cun in cumissari), da Plür (cun in podestat) e da la Val Son Giachen. Il cumissari da Clavenna ed il podestat da Plür en vegnids delegads da las Trais Lias per mintgamai dus onns sco derschaders. La giurisdicziun da Clavenna cun sias sis vischnancas aveva, sco quella da Plür, in cussegl ordinari secret ed ina giunta cun in console (correspondent al mistral) a la testa, tscherni dal cussegl general. La Val Son Giachen, ch'ave-

va privilegis particulars, era dividida en duresch quartiars (reducids a trais il 1650); ella disponiva d'in cussegl general e d'in cussegl da vallada, presidià d'in ministrale responsabel per ils cas civils, entant ch'ils cas criminals vegnivan giudicads dal cumissari da Clavenna, assistì d'assessurs indigens. En quest temp en sa rinforzads ils ports, associaziuns locals ch'avevan il monopol en il transport da martganzia sur il Spleia. A partir dal 1436 ospitava Clavenna ina fiera internaziunala durant la curaisma ed ina pli pitschna il di da S. Andrea (30 da november). Numerus predigtants talians, persecutads da l'inquisiziun sco eretics, en fugids a Clavenna suenter la refurmaziun. Suenter l'Edict da Glion dal 1557 han trais baselgias da Clavenna midà al cult divin protestant, ensemen cun autras baselgias a Prata, Mese e Plür, nua ch'ins ha salvà in disput teologic il 1597. En ils dus decennis turbulentis suenter il Murdraretsch en Vuclina (1620), en il qual Clavenna n'era betg involvì, han la Spagna d'ina vart e Vaniescha, il Grischun e la Frantscha da l'otra vart cumbattì per la supremazia sur Clavenna e la Vuclina. A partir dal zercladur 1629 han mercenaris purtà la pesta en la regiun. Il Capitulat da Milaun dal 1639 ha decretà il return da las Trais Lias, admettend sulettaimain la cretta catolica e scumandond, cun pauc effect, als protestants esters da sa domiciliar en la val.

Alura è suandà in tschientaner da quietezza, durant il qual ins ha puspè reconstruì las baselgias da la citad e dal contadi, erigi ulteriuras baselgias sin las collinas fermamain populadas e fundà duas claustras a Clavenna. Il 1715 han ils Austriacs substituì ils Spagnols en il ducadi da Milaun ed han stipulà il 1762 in contract cun il Grischun (Terz Capitulat da Milaun, en vigur 1763), en il qual in artitgel secret tolerava il domicil dals protestants, en cuntradiziun cun il Capitulat suttaless als cumins. Cunter las potentas familias grischunas sco ils Salis, che controllavan l'economia indigena, hai dà grondas protestas a chaschun da las dietas. Il 1797 en Clavenna e ses contadi vegnids attribuìs a la Republica cisalpina. Suenter la sconfitta da Napoleon han ils Grischuns empruvà, senza success, da reconquistar la Vuclina. Il 1815 ha il Congress da Vienna incorporà il contadi en il reginavel lumbard-venezian, occupà dals Austriacs ch'han laschà construir la nova via sur il Spleia il 1818–22. Pauc pli tard ha inizià il svilup industrial a Clavenna cun la fundaziun da bierarias e da filandarias da mangola. Il 1835 aveva Clavenna 10 interpresas da spediuziun che transportavan martganzia per 40 000 quintals l'onni, surtut sur il Spleia. En las tschintg fieras dal contadi han ins vendì il medem onni 1400 arments indigens e 800 grischuns, 150 chavals indigens e 100 grischuns. Il 1859 è la citadina da Clavenna

vegnida attribuìda, ensemen cun il contadi, al Reginavel d'Italia. Dapi il 1838 existan plans per in tunnel dal Spleia, ins ha dentant preferì il Piemunt. La val è dividida actualmain en 13 vischnancas politics ed ils interess intercommunals vegnan affidads dapi il 1973 a la Comunità montana della Valchiavenna.

Guido Scaramellini

Maira

Flum che nascha en la Val Maroz (antieriura vischnanca da Casaccia) e percorra la Bergiaglia en direziun sidvest per sbuccar al sid da Clavenna en il Lai da Mezzola, talian Mera. Al sid da Casaccia ed a Villa di Chiavenna vegn il flum stagnà per guadagnar energia elettrica. Al Piano di Chiavenna è la Maira vegnida arginada l'entschatta dal 20avel tschientaner. Il Luver (talian Lovero), che sbucca a Castasegna da la vart dretga en la Maira (12avel tschientaner aqua de Louuro), ha furnà da tuts temps il cunfin tranter las dioceses da Cuira e da Com e marca oz era il cunfin naziunale tranter la Svizra e l'Italia.

Martin Bundi

Piuro (Plür)

Citadetta situada a l'ost da Clavenna en la provinza taliana da Sunder, destruida il 1618 tras ina bova. Emprima attestaziun 1021 *Plurium*, talian Piuro, tudestg Plurs. La citad da Plür ha appartegnì oriundamain a Clavenna, ella era però autonoma. En il 15avel tschientaner ha ella cuntanschì la suveranità cumplaina era en fats da dretg civil e penal ed è sa sviluppada ad in lieu prosperavel che explotava, elavurava (vaschella, oravant tut paddellas da sculegl) ed exportava crap da lavetsch, produciva saida e vendeva quella en l'entira Europa. Plinavant aveva Plür stgaffì la basa per in allevament intensiv da muvel al nord da las Alps en la Val da Lei. Plür è vegnì schanegia il 1487 da la campagna militar grischuna, perquai che Berthold Fontana da Riom, parentà cun ina famiglia da Plür, era intervegnì ed aveva preservà la citadetta, cun pajar ina summa pli gronda, d'in incendiament. Cura ch'ils Grischuns han conquistà la Vuclina il 1512 è Plür daventà sedia d'in podestat (enfin il 1618). Da la fluriziun economica dat perdita il palazi anc oz existent, erigi en stil renaschimental dals Vertemate-Franchi (1577). Enturn il 1550 en sa furnadas, sut l'influenza da la Bergiaglia, plaivs evangelicas a Puntegia e Plür. Impurtants members da las familias da commerziant Lumaga e Camullo, persecutads da l'inquisiziun en l'Italia, han promovì la refurmaziun a Plür ed en stads activs en il cussegl da baselgia refurmà. Il 1597 han teologs refurmads e catolics renumads organisà en la baselgia da S. Gion in disput public davart la valur da la messa.

Ils 4 da settember 1618 ha sutterra in bova quasi l'entira citadina da Plür e pro-

bablamain dapli che 2000 abitants. L'exploziaziun excessiva dal crap da lavetsch aveva sutminà la muntogna dal Conto. Immediat suenter la catastrofa han las Trais Lias inizià exchavaziuns; ils davos sondagis en vegnids exequids da l'Associazione Italo-Svizzer per gli scavi di Piuro il 1963–66. La citadetta odierna da Plür cumpiglia las vischnancas da Campedello, Prosto, Cranna, Borgonovo, Savogno e Sta. Croce.

Martin Bundi

Forcola


Pass a 2226 m che collija Soazza en il Mesauc cun Menarola e Gordona sper Clavenna. La ruta sur il Forcola ed il San Bernardin era in'alternativa al Spleia ed è vegnida utilisada il 1564–65 en consequenza da la pestilenza prorutta a Clavenna. Il passadi ha gi in grond svilup suenter la destruziun da Plür e la stagnaziun da sia industria da lavetsch (1618). Soazza è daventà qua tras in center d'elavuraziun ed export dal crap da lavetsch. Il 1634 è vegnida megliegiada la via dal pass sin iniziativa da Soazza, alura amplifigada enturn il 1700 per facilitar il transport da tailas e saida da la Flandra. En il 18avel tschientaner è s'augmentà il traffic sur il pass, effectuoind ina creschientscha considerabla da la populaziun en la regiun da Menarola. A Mese sper Clavenna, en il quartier da Cargasacchi, è vegnida erigida ina staziun da duana. Sin las alps Buglio e Quarnei, etappas dal traffic da transit, hai anc restanzas da sustas e da stallas. Utilisada da cuntrabandiers durant las duas guerras mundialas, vegn la Forcola frequentada oz mo pli darar da viandants.

Martin Bundi

Lai da Mezzola

Antruras part superiura dal Lai da Com, separà oz quasi cumplettamain da quel tras sediments da l'Adda. Mezzola designava oriundamain la zona a la riva nord dal Lai da Com, colmatada da la Maira ad ina penisla. En il temp roman tanscheva il lai fin a Samoloca. Il port, che sa chattava a S. Giovanni al sidost da Casenda, è vegnì spustà enturn l'onni 1000 en consequenza da la terrenisaziun da Vigazzolo a Riva al nord da Novate. Riva è stà fin en il 19avel tschientaner in lieu da transtargiada per il transit internaziunale nord-sid sur il Spleia ed il Set. Qua sa chattavan la fortezza da Mezzola per la controlla dal traffic sin l'aua e la terra, ina susta ed in ospizi (fin viaden il 19avel tschientaner), pastgiras per chavals e muvel sco era implants da pestgar. Ins incassava qua in pitschen dazi, ina taxa da pascualaziun ed ina taglia da port. Suenter l'annexiun da la Vuclina tras ils Grischuns (1512), ch'han construì vias tranter Dubino e Novate, ha augmentà il traffic fermamain; il Lai da Mezzola sa chattava ussa al cunfin dal contadi grischun da Clavenna cun il ducadi da Milaun. Ils implants da pestgar, oriundamain in privileg roial, en passads als Grischuns ch'han pers els durant la Guerra da trent'onn e recuperà pir cun il Terz Capitulat da Milaun (entrà en vigur 1763). Il 1797 è il Lai da Mezzola daventà part da la Republica cisalpina, pli tard da la Lombardia. Tras sediments da la Mera è il Lai da Mezzola vegnì separà a partir dal 16avel tschientaner en il cunturn da Novate quasi cumplettamain dal pitschen Laghetto (numnà era Pozzo di Riva).

Martin Bundi



La bova da Plür dal 1618.

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Ruman-tschia. Editura: Fundaziun Lexicon Istoric Svizzer; versiu online: www.e-lir.ch; versiu stampada: www.casanova.ch u en mintga libreria.